

- प्रधानमंत्री नरेंद्र मोदी अर नाइजीरिया रा राष्ट्रपति बोला अहमद टीनुबू रे बीचे अबूजा मांय बतळ।
- प्रदेश मांय खोल्यो जाएला अंतर्राष्ट्रीय थर रो आयुर्वेद केन्द्र-संयोजनम 2024 रा समापन जळसा मांय उपमुख्यमंत्री दिया कुमारी कर्यो ऐलाण।
- राज्य मांय दो न्यारा न्यारा सडक हादसां मांय पांच लोगां री मौत - 14 घायल।
- प्रदेश मांय घणकरी ठोडां रात रा तापमान मांय कमी ऊं गुलाबी ठण्ड रो एहसास

000

प्रधानमंत्री नरेन्द्र मोदी अर नाइजीरिया रा राष्ट्रपति बोला अहमद टीनुबू आज अबूजा मांय बतळ करी। दोन्यू नेतावां दोन्यू देशां रे बीचे कार्यनीतिक भागीदारी री समीक्षा करी अर आपस री संबंधां ने चोखा बणावण रा मौका माथे बतळ करी। राष्ट्रपति टीनुबू रे साथे शिष्टमंडल थर री बतळ रे दौरान प्रधानमंत्री कयो के भारत-नाइजीरिया रे साथे आपरी कार्यनीतिक भागीदारी ने घणो महतव देवे है। वणा कयो के दोन्यू देशां रे बीचे हिफाजती, ऊर्जा, प्रौद्योगिकी, स्वास्थ्य, शिक्षा अर संस्कृति रा हलका मांय पेला ऊं मदद चाल री है। प्रधानमंत्री कयो के दोन्यू देश आतंकवाद अर समुद्री लुटेरां री चुनौतियां ऊं निपटण सारू मिलने काम कर रिया है। प्रधानमंत्री ग्रैंड कमांडर ऑफ द ऑर्डर ऑफ द नाइजर ऊं सन्मानित करण रा फैसला सारू नाइजीरिया रा राष्ट्रपति ने धन्यवाद दियो। श्री मोदी कयो के ओ सन्मान फगत वां रो नी, बल्कि सगळा भारतीयों रो है। श्री मोदी कयो के लारला 17 सालां मांय ओ पेलो मौको है जद किण ई भारतीय प्रधानमंत्री नाइजीरिया री जातरा करी है। वणा कयो के भारत, नाइजीरिया रा बाढ़ रा असर वाळा हलकां मांय मदद सारू मानवीय सहायता रा तौर माथे बीस टन सामग्री भेजेला। श्री मोदी नाइजीरिया ने ब्रिक्स रो भागीदार देश बणण माथे बधाई दी। वणा भरोसो जतायो के भारत अर नाइजीरिया ग्लोबल साउथ रा मुद्दां ने विश्व मंच माथे उठावता रेहवेला। प्रधानमंत्री श्री मोदी नाइजीरिया मांय भारतवंशियां ने ई सम्बोधित करेला। इण ऊं पैला प्रधानमंत्री नाइजीरिया री दो दिन री जातरा माथे काले रात अबूजा पूग्या। नाइजीरिया मांय राष्ट्रपति रा आधिकारिक रेहवास माथे प्रधानमंत्री श्री मोदी रो औपचारिक स्वागत करी ज्यो। प्रधानमंत्री रा सन्मान मांय अबूजा शहर री चाबी भेंट करीजी। श्री मोदी आज नाइजीरिया ऊं ब्राजील रा शहर रियो डी जेनेरो रवाना व्हेला। वठे री दो दिन री जातरा रे दौरान वे राष्ट्रपति लुईस इनाशियो लूला दा सिल्वाच कानी ऊं राख्यी ज्यी जी-20 शिखर बैठक मांय हिस्सा लेवेला।

000

रक्षा अनुसंधान अर विकास संगठन-डी आर डी ओ काले ओडिशा तट माथे डॉ. एपीजे अब्दुल कलाम द्वीप ऊं भारत री पेली लाम्बी दूरी री हाइपरसोनिक मिसाइल रो कामयाब उडान परीक्षण कर्यो। ई हाइपरसोनिक मिसाइल ने सशस्त्र बलां सारू डेढ हजार किलोमीटर ऊं बत्ती दूरी ताई न्यारा न्यारा पेलोड ले जावण सारू डिजाइन करी ज्या है।

एक सोशल मीडिया पोस्ट मांय रक्षा मंत्री राजनाथ सिंह उडान-परीक्षण ने ऐतिहासिक कामयाबी बताया है। वणा कामयाब उडान परीक्षण सारू डीआरडीओ, सशस्त्र बलां अर रक्षा उद्योग ने बधाई दी है। ई बीचे, एलन मस्क री कम्पनी स्पेस-एक्स उन्नीस नवम्बर ने अमरीका रा केप कैनावेरल ऊं भारत रा संचार उपग्रह जीसैट-20 ने लॉन्च करेला। भारतीय अंतरिक्ष अनुसंधान संगठन-इसरो रा अध्यक्ष एस. सोमनाथ बतायो के स्पेस-एक्स रो फाल्कन-9 इसरो रा जीसैट-20 ने लॉन्च करेला। 4 हजार 700 किलो रो जीसैट-20 भारत रो सब ऊं भारी संचार उपग्रहां मांय ऊं एक है। ओ देश मांय न्यारी न्यारी महताउ सेवावां देवेला, जिण मांय दूर-दराज रा हलकां सारू इंटरनेट कनेक्टिविटी ई भेळी है।

0000

प्रधानमंत्री नरेन्द्र मोदी बालासाहेब ठाकरे री पुण्य तिथि माथे वां ने श्रद्धांजलि अर्पण करी। आपरा संदेश मांय श्री मोदी कयो के बालासाहेब ठाकरे एक विचारक हा, वणा महाराष्ट्र रा विकास मांय अगाडी भूमिका निभाई अर मराठी लोगां ने मजबूत बणाया। प्रधानमंत्री श्री मोदी कयो के बालासाहेब ठाकरे ने निडर अंदाज अर अटूट समर्पण भावना, आवण वाळी पीढियां ने प्रेरित करेला।

00000

जयपुर रा राष्ट्रीय आयुर्वेद संस्थान मांय व्ह्या संयोजनम् 2024 रो आज समापन व्हे ग्यो। कार्यक्रम मांय उपमुख्यमंत्री दिया कुमारी भेळी व्ही। संयोजनम् 2024 रे तीजे दिन आयुर्वेद चिकित्सक, शिक्षक अर पढेसरां चरक संहिता रा श्लोकां रो भेळो पाठ करयो। ई आयोजन मांय देशभर रा अढाई हजार ऊं बत्ती आयुर्वेद ऊं जुड्या शिक्षक, पढेसर अर शोध करणियां भेळा व्ह्या। समापन जळसा मांय बोलता उपमुख्यमंत्री दिया कुमारी राजस्थान मांय अंतर्राष्ट्रीय थर रो आयुर्वेद सेंटर खोलण रो ऐलाण करयो। वणा कयो के इण ने खोलण सारू तैयारी करी जावे। उपमुख्यमंत्री दिया कुमारी जळसा मांय आयुर्वेद रा हलका मांय ठावा काम करण वाळा देश रा न्यारा न्यारा राज्यां रा आयुर्वेद विद्वानां, चिकित्सकां रो सन्मान ई करयो।

0000

टमाटर रा भाव चोखी सप्लाई रे कारण एक मीनां मांय 22 फीसदी ऊं बत्ती कम व्ह्या है। टमाटर रा अखिल भारतीय औसत खुदरा भाव 14 नवंबर ने 52 रिप्या 35 पीसा किलो हा जो कै 14 अक्टूबर रा 67 रिप्या 50 पीसा किलो रा भाव ऊं 22 दशमलव चार फीसदी कम है। इणी बगत मांय दिल्ली री आजादपुर मंडी मांय मॉडल भाव 5 हजार 8 सौ 83 रिप्या कुन्टल ऊं कम व्हेर 2 हजार 9 सौ 69 रिप्या कुन्टल व्हे ग्या है। ई दौरान न्यारा न्यारा शहरां री मंडियां मांय ई टमाटर री कीमतां मांय कमी दर्ज करीजी है।

000

प्रदेश मांय दो न्यारा न्यारा सड़क हादसां मांय पांच लोगां री मौत व्हे ग्यी अर 14 घायल व्हे ग्या। सांचौर जिला रा पलादर गांव कने बेकाबू ट्रैलर मोटरसाईकिल रे टक्कर मार दी, जिण मांय दो लोगां री मौका माथे ई मौत व्हे ग्यी। ई हादसा मांय घायल एक मिनख री ईलाज रे दौरान अस्पताल मांय मौत व्हे ग्यी। तीन्यू मरण वाळा गुजरात रा रेहवासी हा। वठे ई बूंदी जिला मांय देहीखेडा घाट का बराना कने शनिवार देर रात श्रद्धालुआं ऊं भरी एक बस पलट ग्यी। ई हादसा मांय दो लोगां री मौत व्हे ग्यी अर 14 घायल व्हे ग्या। घायलां ने कोटा रैफर करी ज्या है। अ सगळा सिरधालू चौथ का बरवाडा मांय चौथ माता रा दर्शन करण जा रिया हा।

000

भगवान बिरसा मुंडा री विरासत ने याद करण सारू देशभर रा शैक्षणिक संस्थानां कानी ऊं जनजातीय गौरव पखवाडो मनायो जावे। देशभर मांय मनाया जावण वाळा ई उत्सव मांय भारत री समृद्ध आदिवासी विरासत अर आदिवासी समुदायां रा योगदान रो सन्मान करे है। ओ पखवाडो भावी पीढियां ने वां रा बलिदानां ने मंजूर करण अर वां री सांस्कृतिक प्रथावां अर कलात्मक अभिव्यक्तियां ने बचावण ने बधावो देवण सारू प्रेरित करेला। प्रदेश मांय ई जनजातीय गौरव पखवाडा रे तैत न्यारा न्यारा कार्यक्रम आयोजित करया जावे। सांचोर जिला रा रानीवाडा मांय आदिवासी समाज रो सम्मेलन व्हयो। इण मांय समाज ने मजबूत अर ताकतवान बणावण माथे विचार व्हयो। सम्मेलन मांय घणी तादाद मांय भील अर आदिवासी समाज रा लोग मौजूद रिया।

00000

प्रदेश मांय घणकरी ठोडां रात रा तापमान मांय कमी अर सांझ संवारा गुलाबी ठण्ड महसूस होवण लागी है। उत्तर भारत मांय बिरखा अर बर्फबारी रा असर ऊं राज्य रा केई शहरां मांय आज संवारा घणो कोहरो छाया ज्यो रियो। हनुमानगढ़, सीकर रा फतेहपुर, जैसलमेर समेत केई ठोडां माथे कोहरा रो असर निजर आयो। मौसम महकमा

मुजब लारला 24 घंटां रे दौरान प्रदेश रा 12 शहरां मांय कमती रो तापमान 15 डिग्री सेल्सियस ऊं नीचे दर्ज करी ज्यो। राज्य मांय सब ऊं कम 9 दशमलव 4 डिग्री सेल्सियस कमती रो तापमान माउंटआबू मांय दर्ज व्ह्यो। श्रीगंगानगर मांय आज दिन मांय तावड़ो निकलण ऊं लोगां ने ठण्ड ऊं आराम मिल्यो।

मौसम केन्द्र जयपुर मुजब आवता दिनां जयपुर अर बीकानेर संभाग मांय कठे-ई-कठे घणो कोहरो छाया रहवण रा आसार जताया है। वठे ई राज्य रा घणकरा ठोडां कमती रा तापमान मांय कमी आवण रा ई आसार है।

000

जयपुर काले आपरो 297वों थापना दिवस मनावेला। ई सिलसिला मांय शहरभर मांय केई कार्यक्रम व्हेला। जळसा री कड़ी मांय आज न्यारा न्यारा संगठनां कानी ऊं जयपुर रा संस्थापक सवाई जयसिंह द्वितीय ने याद करी ज्यो। जयपुर जळसा री कड़ी मांय काले ऊं न्यारा न्यारा कार्यक्रमों री सरुआत व्हेला जो 18 दिसम्बर ताई चालेला। ई दौरान सांस्कृतिक, सामाजिक अर अंतर्राष्ट्रीय थर रा आयोजन ई व्हेला।

000

जयपुर रा नामी खोले का हनुमान जी मिन्दर मांय आज 64वों लक्खी अन्नकूट महोत्सव रो आयोजन करी ज्यो। ई आयोजन मांय 1 लाख 75 हजार ऊं बत्ती सिरधालू भेळा व्ह्या। दोपहरां 1 बज्यां ऊं सरु व्ही पंगत प्रसादी रो दौर देर रात ताई चालतो रेहवेला। आयोजन ऊं पेला 61 मिन्दरां मांय अन्नकूट रो भोग लगायी ज्यो। हर साल होवण वाळा ई अन्नकूट महोत्सव मांय न्यारा न्यारा वर्गा रा एक साथ पंगत प्रसादी ग्रहण करे है।

000

केंद्रीय कृषि अर किसान कल्याण राज्यमंत्री भागीरथ चौधरी एक दिन रा दौरा माथे आज अलवर पूग्या। अंबेडकर नगर मांय भाजपा दफ्तर मांय वणा भाजपा ओहदादारा अर कार्यकर्तावां रे साथै मीटिंग करी। बैठक मांय भाजपा सदस्यता अभियान री प्रगति माथे बतळ करी। वणा कह्यो के आवती तीस नवम्बर ताई ई अभियान रा लगस ने हासिल कर लिया जायेगा

00000